



Réponse commune de Monsieur le ministre de l'Économie, des PME, de l'Énergie et du Tourisme, Lex Delles et de Monsieur le ministre des Affaires étrangères et du Commerce extérieur, Xavier Bettel à la question parlementaire n°3093 du 23 octobre 2025 de Monsieur le député Alex Donnersbach au sujet de la dépendance de l'industrie européenne et luxembourgeoise vis-à-vis de la Chine

„1. Huet d'Regierung Kenntnis doriwwer, ob och lëtzebuergesch Betriber vum potenzielle Liwwerengpass beim Chip-Produzent Nexperia betraff sinn?“

D'Regierung verfüügt iwwer Informatiounen zu verschiddene Betriber, déi direkt vun engem potenzielle Liwwerengpass betraff wieren, virun allem am Automobilsektor, wou Nexperia-Chippen e wesentleche Maartundeel ausmaachen. An deem Kader setzt d'Lëtzebuerger Regierung, fir den Impakt aschätzen, suivéieren an aktiv un europäesche Léisungsmethoden ze kënnen, op en enke Kontakt mat de betraffene Betriber a Verbänn.

Zousätzlech géif et och en indirekten Impakt op Betriber ginn, déi iwwer hir Liwwerketten op Produkter ugewise sinn, déi Nexperia-Komponenten enthalten. Wann zum Beispill am Fall vun engem Réckgang vun der Autosproduktioun manner Nofro bestoe géif, wieren och Zouliwwerer dovun betraff.

„2. Wéi ofhängeg sinn d'lëtzebuergesch Industriebetriber vu chineeseschen Importer vu seelenen Äerden a Mikrochippen? Huet d'Regierung konkret Zuele fir dës Ofhängegkeet ze erfassen?“

D'Ofhängegkeet vun de Lëtzebuerger Industriebetriber vu seelenen Äerden a Mikrochippen ass schwéier am Detail a chiffriert ze erfassen, well d'Liwwerketten héich komplex sinn an nëmmen op Betribsniveau detailléiert disponibel sinn. Zousätzlech variéieren dës Ofhängegkeete staark jee no Sektor an Tätigkeetsberäich vun de Betriber.

D'Regierung steet dofir a regelméissegem Austausch mat den zoustännegen Verbänn, fir en Iwwerbléck iwwert d'Ofhängegkeeten an d'Risiken an de verschiddene Beräicher.

„3. Existéiert en nationalen oder europäeschen Noutfallplang fir de Fall, datt China de komplette Liwwerzougang vu seelenen Äerden an Europa géif zoudréinen?“

4. Wat ënnerhëlt d'Regierung konkret, fir d'Ofhängegkeet vun eiser Industrie vis-à-vis vu China vu seelenen Äerden ze reduzéieren?“

Lëtzebuerg ass sech den Defizit bewusst déi sech der nationaler an europäescher Industrie stellen, an handelt deementspriechend. Dës Herausforderungen müssen awer um Niveau vum Bannemarché a vun der EU ugaangen ginn.

Den Internal Market Emergency and Resilience Act vun der EU (IMERA) huet als Zil, fir a Krisesituatiounen d'Zirkulatioun vu wesentleche Wueren, den Déngschtleeschungen an de Persounen an der ganzer EU ze garantéieren. E soll och d'Verfügbarkeet vu kritesche Versuergungsgidder ofséchere wann d'EU mat enger Noutfallsituatioun konfrontéiert ass.

Dem IMERA féiert en ëmfaassende Virbereedungs- a Krisereaktiounssystem am Bannemaart an. Dëse System, dee gräift wa keng spezifesch sektoriell Moosname bestinn, féiert d'Transparenz an d'Koordinatioun tëscht de Länner vun der EU.

Den IMERA wäert och zu Lëtzebuerg ëmgesat ginn an am Mee 2026 a Kraaft trieden.

Lëtzebuerg wäert och wéi all d'EU-Memberstaaten de Critical Raw Material Act ëmsetzen an ass am European Critical Raw Material Act Board vertrueden.

D'EU huet sech mam Critical Raw Material Act zum Zil gesat, eng sécher a méi resilient Versuergung mat kritesche Réimaterialie fir déi europäesch Industrie ze garantéieren. Dës Réimaterialien si fir déi gréng an digital Transitiounen noutwendeg, grad ewéi fir d'Verdeedegungsindustrie an d'Weltraumaktivitéiten. Et geet drëm déi laangfristeg Konkurrenzfähigkeit vun der EU ze stäerken an déi strategesch Autonomie ofzesécheren, dëst an engem geopoliteschen Ëmfeld dat séier changéiert an ëmmer méi erausforderend gëtt¹.

„5. Wéi eng Positioun vertrëtt d'Regierung am Conseil um europäeschen Niveau, wa Froen zur Schafung vun enger eegestänneger a resistenter europäescher Industriepolitik um Dësch leien?“

D'Regierung ënnerstëtzt zanter laange Joren all Bestriewung op EU-Niveau fir eng nohalteg a resilient Industriepolitik tëschent de 27 Memberstaaten an zesumme mat der EU-Kommissioun en place ze setzen an ze koordinéieren.

E gutt funktionéierende Bannemaart, deen de fräie grenziwwerschreidende Verkéier fir Wueren, Servicer an Aarbechter garantéiert, ass fir d'Regierung d'Basis fir d'Kompetitivitéit vun der EU-Industrie. D'Regierung setzt sech dës weidere fir en ugepassten EU-Kader a Saache Staatsbäihëllefen an, deen et erméiglecht d'Entreprise an der grénger an digitaler Transitioun ze begleeten an op Dysfonctionnementen vum Marché ze reagéieren.

„6. Wéi eng Positioun vertrëtt d'Regierung am Conseil um europäeschen Niveau, wa Mesurë berode ginn, fir alternativ Importlänner vu seelenen Äerden a Mikrochippen z'entwéckelen?“

Lëtzebuerg ënnerstëtzt d'Approche vun der Europäescher Unioun fir d'Handelspartnerschaften ze diversifizéieren. D'Negociatioun vun neie Fräihandelsaccorden ziilt dorop, d'Ofhängegkeet vun eenzele Mäert ze reduzéieren, Liwwerketten ze stäerken an domadder méi resilient ze ginn, a geopolitesche Spannungen entgéint ze wierken.

1

https://ec.europa.eu/commission/presscorner/api/files/attachment/874736/Factsheet_GD_European%20Critical%20Raw%20Materials%20Act%20.pdf

„7. Ënnerstëtzt déi lëtzebuergesch Regierung Contre-Mesuren als Äntwert op déi nei chineesesch Exportkontrollen a Verbueter? Falls jo, wéi eng Zort vu Mesuren hält d'Regierung a deem Kader fir ubruecht?“

Lëtzebuerg beobacht déi rezent Entwécklung mat grousser Suerg a setzt sech weiderhin dofir an, fir wirtschaftlech Dependancen op laang Siicht ze reduzéieren. Lëtzebuerg begréisst d'Suspensioun vun der chineesescher Exportkontrolle vum 7. November 2025, an ënnerstëtzt d'Effort vum Europäescher Kommissioun fir e konstruktiven Dialog mat China weiderhin oprecht ze halen.

Luxembourg, le 26/11/2025

Le Ministre de l'Économie, des
PME, de l'Énergie et du Tourisme

(s.) Lex Delles